

欽  
定  
全  
唐  
文

欽定全唐文卷九百六十九目錄

闕名 十

請追封皇兄皇姪奏

請修唐史奏

乞降河南諸方鎮制命奏

請追取本朝法書奏

論兩省官常朝宜拜奏

中書不得輕給告示奏

定諸道奏除官員額數奏

定刺史縣令賞罰奏

請准例徵光臺禮錢奏

量添縣官尉簿奏

請令節度等使歸本任奏

請重行分察條例奏

點檢前資官告勅奏

請詳定長定格循資格十道圖奏

任諸藩奏辟軍事判官奏

請權停選舉奏

貞簡太后升祔禮畢請行享祀奏

上皇太子婚禮奏

請定東都鄴都奏

請定鄉貢童子事例奏

皇太后喪服議奏

議毀京內南北城奏

甄錄僞蜀官員奏

欽定全唐文卷九百六十九

闕名十

請追封皇兄皇姪奏

開平元年

東漢受命伯升豫其始謀西周尚親叔虞荷其封邑故皇兄存凋零霜露綿歷歲時恩莫逮於陟岡禮方宏於事日皇姪故邕州節度使友寧故容州節度使友倫頃因締構俱習韜鈴並以戰功歿於王事永言帶礪合議封崇

請修唐史奏

龍德元年二月史館

伏見北齊文士魏收著後魏書於時自魏太武之初至於

北齊書不獲就乃大徵百官家傳刊總斟酌隨條甄舉搜訪遺亡數年之間勒爲一代典籍編在北史固非虛言臣今請明下制勅內外百官及前資士子帝戚勲家並各納家傳具述父祖事行源流及才術德業灼然可攷者並纂述送史館如記得前朝會昌已後公私亦任抄錄送官皆須直書不用文藻兼以兵火之後簡牘罕存應內外臣寮曾有奏行公事關涉制置或討論沿革或章疏文詞有可採者並許編錄送納候史館修撰之日攷其所上公事與中書門下文案事相符會或格言正辭詢訪不謬者並與

編載所冀忠臣名士共流家國之耿光孝子順孫獲記祖  
先之丕烈而且周德見乎殷紀舜典存乎禹功非惟十世  
可知庶成一朝大典臣叨庸委任獲領監修將贖素餐輒  
干元覽

乞降河南諸方鎮制命奏

同光元年十一月

河南諸方鎮節度刺史昭洗之後未有新官每上表章只  
書姓名未頒渙汗必負憂疑望宣付各降制命以表新恩

請追取本朝法書奏

同光元年十二月御史臺

本朝法書自朱溫僭逆刪改事條或重貨財輕入人命或

自徇枉過濫加刑罰今見在三司收貯刑書並是僞廷刪改者兼僞廷先下諸道追取本朝法書焚毀或經兵火所遺皆無舊本節目只定州勅庫有本朝法書具在請勅定州節度使速寫副本進納庶刑法令式並合本朝舊制

論兩省官常朝宜拜奏

同光元年十二月  
中書門下

每日常朝百官皆拜獨兩省官不拜准本朝故事朝退於廊下賜食謂之廊餐百官遂有謝食拜惟兩省官本省有厨不赴廊餐故不拜伏自僖宗幸蜀迴以多事之後遂廢廊餐百官拜儀至今未改將四十載禮恐難停惟兩省官



獨尚不拜豈可終日趨朝曾不一拜獨於班列有所異同  
若言官是近臣於禮尤宜肅敬起今後逐日常朝宣不坐  
除職事官押班不拜外其兩省官與東西兩班並齊拜

中書不得輕給告示奏

同光二年正月  
中書門下

准本朝故事加封建諸王內命婦及宰相翰林學士中書  
舍人諸道節度觀察團練防禦留後郎中書帖官告索綾  
紙票軸下所司書寫印署畢進入宣賜其文武兩班並諸  
道官員及奏薦將校勅下後並合是本道進奏院或本官  
自於所司送納朱膠綾紙價錢各請出給伏自僞庭皆隳

本朝事例每降文字下中書不分別重輕便令官給告示  
遂致所司公事全失規程自今後如非前件事例並請官  
中不給告示其內司大官並侍衛及賞軍功將校轉官即  
不在此限所冀受宣賜者倍榮恩渥非事例者不敢希求  
一則致顯辨尊卑一則免無名費耗

定諸道奏除官員額數奏

同光二年三月  
中書門下

糾轄之任時謂外臺宰字之官古稱列爵如非朝命是廢  
國章近日諸道多是各列官銜便指州縣請朝廷之正授  
樹藩鎮之私恩頗亂規程宜加條制自今後大鎮節度使

管三州已上者每年許奏管內官三人如管三州已下者  
許奏管內官二人仍須有課績尤異方得上聞若止於簡  
慎無瑕徵科及限是守常道只得書考旌善不得特有薦  
奏其防禦使每年只許奏一人並無尤異不得奏薦刺史  
無奏薦之例不得輒亂規程更有將資官員請他處除授  
謂之橫薦最亂格文其已前事件如敢違所司不得輒與  
通進若奏下中書亦不在施行之例

定刺史縣令賞罰奏

同光二年三  
月中書門下

賞善罰惡致理之源選材任能爲政之本所在刺史縣令

有政績尤異爲衆所知或招復戶口能增加賦稅者或辨雪冤獄能活人生命者及去害物之積弊立利人之新規有益於州縣爲衆所推者即仰本處逐件分明開奏不得輒加緣飾以爲浮詞據事狀不虛則加獎激以勸能吏如在任貪猥誅剝生靈公事不治爲政怠惰具事節聞奏勘覈不虛當加譴罰以戒慢官其州縣官任三考滿即具闕申送吏部格式候勅除銓注本道不得擅差攝官輒替正授者

請准例徵光臺禮錢奏

同光二年三月  
御史臺

新除諸道節度觀察防禦經畧等使刺史縣令及諸道幕府兼諸司帶憲銜兼官合納光臺錢謹具本朝元納及後減落錢數如後兼御史大夫元納三十貫減落外今納一十五貫兼御史中丞元納二十貫減落外今納一十貫文兼侍御史元納八貫三百減落外今納五貫一百五十文兼殿中侍御史元納一十一貫三百減落外今納五貫六百五十文兼監察御史元納一十三貫三百減落外今納六貫六百五十文以前臺司准本朝例及減落外後徵前數分析如前應有諸道節度觀察使刺史經畧防禦等使

及諸道幕府上佐官并諸司班行新授兼官者並合送納  
前件光臺憲禦禮錢今欲准例勒辭謝驅使官申報牒兵  
部勒告身案除准宜取外准例須候送納光臺禮錢了朱  
鈔到方可給付轉帖諸道進奏及知後院等准從前事件  
申報催徵無致有隳舊規

量添縣官尉簿奏

同光二年  
四月吏部

准本朝故事州府官員府置司錄參軍外有功倉戶法兵  
事六曹州有錄事參軍亦置六曹縣置令丞主簿各一員  
尉三員分判公事自後除兩京外都督府及州置戶法二

員餘四員並省縣置令主簿各一員丞尉並省者伏以今年除本分合格選人外有郊裡行事人數絕多伏見州官事簡掾曹請依舊兩員縣局務繁佐官請添一員其間有尉無簿者請添置主簿一員其赤畿次畿並請准此除兩京外其判司只置司戶司法兩員

請令節度等使歸本任奏

同光二年四月  
中書門下

諸道節度防禦刺史各著功名並全忠孝洎蒙昇獎皆荷渥恩雖萌爲治之心未展分憂之効况聞藩府不可以久虛侯伯不可以久闕藩府虛則兵不輯侯伯闕則化不行

繇此觀之爲務甚急請令歸本任不奉詔旨不得輒離治所

請重行分察條例奏

同光二年五月御史臺

准本朝故事當司六察合行職事條例如後吏察應吏部  
行內南北兩曹磨勘選人合具駁放判成人具名銜報分  
察使及三銓應鑠注官後具前銜後擬報分察使典簡如  
有踰濫即察使舉追本行令使推勘兵察應兵部司公事  
一一合報察使戶察應戶部司諸州戶帳貢物出給蠲符  
具事件合報察使刑察應刑部司法律赦書德音流貶量



移斷罪重輕合報察使禮察應禮部補轉鑄印諸祠祭料  
法物合報察使工察應工部司工役等合報察使伏以御  
史臺六員監察謂之分察使察訪綱舉動靜必行但緣曠  
廢久不施行今欲重行條貫

點檢前資官告勅奏

同光二年五  
月中書門下

凡有進狀乞官及諸州府初奏請判官薦舉前資自請中  
書求官等竊聞所稱頭銜多有踰越中書旣無舊案除授  
何以爲憑起今後凡有諸色前資若命官者除近曾任朝  
官及有科第外清資官爲衆所知並須追到前任告勅中

書點檢後方進擬貴絕虛授以杜僥求

請詳定長定格循資格十道圖奏

同光二年八月  
月中書門下

吏部三銓門下省南曹廢置甲庫格式流外部銓等司公  
事並繁長定格循資格十道圖等前件格文本朝創立簡  
制姦濫倫敘官資頗謂精詳久同遵守自亂離之後巧僞  
滋多兼同光元年八月車駕在東京權判南曹工部員外  
郎盧重本司起請一卷蓋以興復之始務切懷來凡有條  
流多失根本以至冬集起選人並南郊行事官及陪位宗  
子共一千三百餘人銓曹檢勘之時互相援引去留之際

不絕爭論若有依違必長訛濫望差權判尚書省銓左丞  
崔沂吏部侍郎崔貽孫給事中鄭韜光李光序吏部員外  
郎盧損等同詳定舊長定格循資格十道圖務令簡要可  
久施行

任諸藩奏辟軍事判官奏

同光二年八月  
中書門下

僞廷之時諸藩參佐皆從除授自今後諸道除節度副使  
兩使判官除授外其餘職員並諸州軍事判官各任本處  
奏辟其軍事判官仍不在奏官之限所冀招延之禮皆合  
於前規簡辟之間無聞於濫舉

請權停選舉奏

同光二年十月  
月中書門下

獻可効忠前經之令典因時建議有國之明規道既務於  
化成事亦敷於競勸敢裒宸聽輒罄芻言伏惟陛下業茂  
經綸功成理定五材七德威冠於伐謀百氏三墳義彰於  
知教爰自中興啟運下武膺期照臨而日月光華鼓舞而  
乾坤交泰英明取士睿哲崇儒誠宜便廣於搜羅豈可尚  
令於淹抑但以今春貢士就試不多即目選人磨勘未畢  
宗伯莫臻於俊乂天官難辨於妍媸况已過秋期將行公  
事側聞道路悉是家貧比及到京多踰程限文闈選部皆

礎條流伏請權停貢舉一年俟遷鶯者更勵進修希于祿  
者益加循省然後精求良幹博採異能免其遺賢庶同樂  
聖

貞簡太后升祔禮畢請行享祀奏

同光二年  
禮儀使

伏准禮喪三年不祭惟祭天地社稷爲越紼行事此古制  
也爰自漢文益尊神器徇至公絕私之義行以日易月之  
制事久相沿禮從順變今園陵已畢祥練旣除宗廟不可  
以乏饗神祇不可以廢祀宜遵禮意式展孝思伏請自貞  
簡太后升祔禮畢應宗廟使樂及羣祀並准舊施行

上皇太子婚禮奏

同光二年  
禮儀使

按本朝舊儀自一品至三品婚禮得服袞冕劍佩衣九章  
今皇太子興聖宮使繼岌雖未封建官是檢校太尉合准  
一品婚禮施行其妃准禮婦人從夫之爵亦准一品命婦  
至行親迎之日太常鹵簿鼓吹前導乘輅車其妃花釵九  
枝博鬢褕翟衣九等其日平明皇帝差官告親廟一室宗  
正卿攝婚主行禮其夕親迎興聖宮使乘輅車鹵簿鼓吹  
前導至女氏之門以結綵車御輪交車

請定東都鄴都奏

同光三年三  
月詳定院

近并魏州爲東京簡諸道州縣須先定兩府始可各定官品未審依故事京兆河南爲兩府太原興唐爲次府天復以興王之地別有進止勅不惟府額各定於等差兼亦都名須正於升降將爲經久之制宜遵固本之文本朝故事雍州爲西京京兆府雒州爲東都河南府是謂京都兩府并州舊爲北都太原府在兩府之次近以中興大業以魏州爲東京興唐府權謂東京爲雒京竊以雒京歷代帝王之都四方朝貢所便爰自漢魏迄於隋唐方建都城是比辰極宜依舊以雒京爲東都魏州改爲鄴都興唐府與北

京太原府並爲次府豈獨設官分職命秩免惑於有司抑亦畫界分疆取則無違於故事

請定鄉貢童子事例奏

同光三年  
五月禮部

當司准流內銓牒應請定冬集舉人內有前鄉貢童子者三銓已前團奏冬集皆署前鄉貢童子伏准格文只有童子科此無鄉貢字銓司先爲請定冬集舉人九經張仲宣等內有前鄉貢明經童子成光誨遂檢尋六典及蘇冕會要又無本朝書子細檢討惟有十三年閏十二月勅諸道應薦萬言及童子起今後不得更有聞薦據此童子兩字



皆由諸道表薦固無鄉貢之名又無口議帖經亦不合有明經之字進則止於暗誦便號神童此外格文別無童子其成光誨銓司准格只收署前童子團奏去二月十五日具狀申留司宰臣取裁奏例准申者伏緣三銓見團奏冬集右內有鄉貢及明經字已依成光誨例准格只署童子團奏次諸左伏以院司常年考試皆憑諸道表薦降勅下到當司准格考試及格者便放及第其同光二年童子郭忠恕等九人皆是表薦童子勅內并納到家狀並有鄉貢兩字院司檢勘同便榜示引試及第後先具白關牒報吏

部南曹續便團奏者關奏狀下到中書省追當司元下納家狀檢點同覆奏放勅經過諸處勅下後方始到當司備錄黃關牒報御史臺尚書省并吏部南曹今准流內銓牒伏緣院司承前皆憑勅命施行童子勅內並有鄉貢兩字若使下落恐涉專擅者

皇太后喪服議奏

同光三年七月太常禮院

案故事中書門下翰林學士在朝文武百官內諸司使供奉官已下從成服三日每日赴長壽宮朝臨自後不臨其服以日易月三十日除至小祥合釋服每至月朔月望小

祥大祥釋服日未除服者縗服臨已除服者則素服不臨  
並赴長壽宮先拜靈訖移班近東進名奉慰又奏准故事  
文武前資官及六品已下未升朝官并士庶等各於本家  
素服一臨禁衛諸軍使已下各於本軍廳事素服一臨僧  
尼道士各於本寺觀一臨內外命婦各於本家素服朝臨  
三日諸道節度觀察防禦團練刺史及寮佐等聞哀後當  
日成服三日改慘十三日除

議毀京內南北城奏

同光三年九月  
中書門下

右補闕楊途先奏毀廢京內南北城臣檢到同光二年八

月二十七日河南尹張全義奏臣自僖宗朝叨蒙委寄節制雒京臨涖之初須置城壘臣乃取南市曹界分兼展一兩坊地修築兩城以立府衙廨署今區宇一平理合毀廢其城濠如一時平治即計功不少百姓忙時難爲差使今欲且平女牆及甕門餘候農隙別取進止者奉勅京都之內古無郡城本朝多事以來諸侯握兵自保張全義土功斯毀李罕之塞地猶存時旣朗清故宜除剗若差夫役又恐擾人宜令河南府先分劈出舊日街巷其城濠許人占射平填便任蓋造屋宇其城基內舊有巷道處便爲巷道

不得因循妄有侵占仍請限一月如無力平剗許有力人戶占射平填

甄錄偽蜀官員奏

同光四年二月  
中書門下

偽蜀官員先有赦旨黜降近者員數極多相次到闕並是未承前勅慮抱憂疑宜令御史臺具所到官員出身歷任三代家狀約偽官品秩准前勅次第當擬同正官奏復如是偽蜀將相家屬稍多即於山東州府安置如位卑家屬少者或是本朝舊人有骨肉見在班行即任便居止或是三川居人願還本土亦俟三兩日放歸本處或有本朝曾

登科第歷任班行材器爲衆所知可以甄錄即續具人才  
酌量奏擬

欽定全唐文卷九百七十目錄

闕名 十一

請停賜庶僚官告及朝對奏

請定新除官及差使辭謝奏

請定臺參奏

請復臺巡舊例奏

請定檢勘非理死亡及喪葬儀制奏

請增五經考試官奏

請定選人過格奏

王蟾應歸吏部考試奏

請下所司抄錄詔書送館奏

請添點檢朝班御史奏

條覆選人事例奏

覆追崇廟號奏

請令宰臣兼判國子祭酒奏

重給告身事例奏

請定奏薦人數奏

請臨軒冊命奏



論宰臣常朝宜拜奏

朝官升任宜令中謝奏

請復置格杖奏

羣臣乞假覲省請量賜茶藥奏

請准舊式五月一日起居奏

景宗宜合食太廟奏

請及第人文書詳書履歷年月奏

請檢勘南郊行事官文書奏

條陳貢舉事例奏

重定正冬朝會禮儀奏

請禁師生稱謂奏

請定銓選事例奏

請依舊格考試進士奏

請定褹纓配食奏

欽定全唐文卷九百七十

闕名 十一

請停賜庶僚官告及朝對奏

天成元年七月  
中書門下

往例朝廷命官除將相外並不賜官告因僞朝條流凡准  
宣授官卽特恩賜令使府判官皆許本道奏請或聞多在  
京師至於令錄悉是放勅後本官自於吏部出給告示中  
書不更管繫今若爲點檢所授官吏器能欲令親承聖澤  
臣等商量自兩使判官州縣令錄在京除授者卽望令於  
內殿謝官便辭赴任不便進納官告其判司主簿以下極

是卑秩不合更許朝對勅下後望准舊例處分

請定新除官及差使辭謝奏

天成元年八月御史臺

凡新除官及差使者合於正衙謝辭每遇正殿起居日百官不於正衙序班致差使及新除官辭謝不得或恐差使者已定發日除宣催發以一日無班便妨辭謝臣今參詳每內殿起居日百寮先序班於文明殿庭候辭謝官退則班入內殿冀便於官吏辭謝者

請定臺參奏

天成元年十一月諸道進奏官

今月四日中丞上事臣等禮合至臺比期不越前規依舊

傳語忽蒙處分通出尋則再取指揮要明審的又蒙問大夫相公上事日如何臣等訴云大夫曾爲宰相進奏官伏事中書事體之間實爲舊吏若以別官除授合云傳語勞來又堅令通出臣等出身藩府不會朝儀拒命則恐有奏聞遵稟則全隳則例伏恐此後到臺參賀儀則不定者

請復臺巡舊例奏

天成元年十一月御史臺

謹具本朝舊例合行公事如右應諸道進奏院准本朝例各合置臺巡驅使官一人凡有公事並合申報臺巡逐日在臺祇候應奉公事應諸道進奏官每四孟月初及五月

冬至新除大夫中丞並合臺參伏自僞朝以來全墜舊例  
今准勅命條流請准本朝舊例施行應諸道節度觀察防  
禦經畧團練使及諸州刺史新除赴任及郎幕上佐官等  
得替及准宣進奉到闕及歸本道並合廊參正衙謝見辭  
如遇大夫中丞入臺並合臺參凡有公事及到發日並  
合申報如遇追勘進奏官典勘責科罰又伏以僞朝以來  
全墜往制旣未條理轉失繩規伏乞特降朝勅指揮免令  
墮紊

請定檢勘非理死亡及喪葬儀制奏

天成元年十  
二月御史臺

應在京兩街司及坊市士庶人家及諸道經商客旅或有  
投井自縊及僕婢諸色人等非理歿故伏據近年以來凡  
是死亡之家並是臺司左右巡使舉勘差驅使官與諸司  
人同行檢驗指揮如此施行相承已久臺司若不差人舉  
勘卽非理幽冤無由申雪若一一檢驗卽事故之家多稱  
騷擾況臺司亦常憂兩巡驅使官與諸司同巡檢節級等  
於有事人家妄有所求今詢訪故事准當司京兆按往例  
凡京城內應有百姓死亡之家祇勒府縣差人檢驗如是  
軍人祇委兩軍檢勘如是諸道經商客旅卽地界申戶部

使差人檢勘仍逐司各具事由及同檢勘行人等姓名申  
臺及本巡察其間或有事涉冤濫曲直不分察訪得知及  
有人論訐臺司並行追勘如是兩班官吏之家卽合是臺  
司檢勘伏請自今以後並准故事施行除百司外臺中不  
更差人誨疑例檢勘如是則軍人百姓各有區分事涉冤  
誣卽行追勘合具舉明庶遵故事者兼得左右巡使狀抄  
錄到喪葬格例所設車輦儀注物色祇爲官品高下無官  
秩若陳儀主具供應故犯典刑今則凡是葬儀動踰格物  
但官中只行檢察在人情各盡孝思徇彼稱家之心許便



送終之禮臺司又難將孝子盡決嚴刑祇以供人例行書  
罰以添助本司支費兼緣設此防禁比爲權豪之家多有  
違禮從厚若貧窮下士尚猶不便送終必無僭禮可以  
罰兩京卽是臺司舉司諸州府卽元無條例者凡棺槨不  
計有官品並不得於棺槨上雕鏤畫飾施戶牕欄檻楹等  
官至四品以上使方相七品以上使魃頭四目元衣朱裳  
執戈揚楯如常制七品以下及無官品者勿用凡明器等  
三品以上不得過九十事五品以上不得過六十事九品  
以上不得過四十事當廣地軸誕馳馬及執役人高不得

過一尺其餘音聲隊馬威儀之屬各准平生品秩所用仍以木瓦爲之不得過七尺及別加畫飾諸纛今謂之鵝毛五纛五品以上竿長七尺五品以下長五尺無官品者勿用諸三品以上引披鐸嬰挽歌鼓六行每行六人五品以上二引二披四鐸四嬰挽歌四行四人九品以上二嬰無者勿用諸車輦三品以上油幟朱絲絡網施襪兩廂畫龍虎幟竿朱垂六旒蘇今之纓帶也七品以上油幟襪兩廂畫雲氣垂四旒蘇九品以上無旒蘇車輦上有結絡者三品以上及將相有鳳臺自諸品官及郡守升朝者羚羊山

華餘並平憶百姓喪葬祇合使輓甲車無憶襪畫飾並無  
已前儀禮部格物凡官人百姓送葬競爲奢僭不依禮式  
宜令所司切加糾察如物色等數目大小有違條式及輒  
飾以金銀者杖六十奉勅今後文武兩班及諸司官吏并  
諸道經商客旅凡有喪亡卽准臺司所奏故事施行其街  
坊百姓及軍人之家每有死喪兼所使廝兒妮子因依暝  
及行投井自縊非理自致身命者據臺司狀委府縣及兩  
軍軍巡差人檢勘竊慮前件事故之家或所居隘窄兼阻  
暑毒之月尸靈難久停留若待申報官中檢勘縱無邀難

須經時日今仰本戶可便喚四鄰看驗如無他故便任本主送殯仍具結罪保明文狀報官若有枉有傷害致死鄰人妄有保明本戶并保人勘責不虛各量罪科斷兼聞諸州官府士庶之家或有死喪亦是須候分巡院檢勘頗致淹留旣鼓瑟調甚傷風教亦仰約有在京事條例理處分其庶人喪葬所設車舉儀注格例狀稱近日庶流多有違越臺司又難將孝子盡決嚴刑祇以供人例行書罰添助本司支費據此懲創名目且非爲政憲綱自今以後所有各計品秩之外及庶人喪葬宜令御史臺委兩巡御史點

檢假賃行人須依條例如有違越據所犯重輕臨時科斷  
臺司不得妄有攪擾

請增五經考試官奏

天成二年  
正月禮部

五經考試官先在吏部日長定合請兩員數年係屬貢院  
准新定格文祇令奏請一員兼充考試官緣今年科目人  
數轉多却欲依舊請考試官各一員如蒙允許續具所請  
官名進御申奏

請定選人過格奏

天成二年三  
月中書門下

據南曹駁放選人累經銓及經中書門下論接准堂判具

新舊過格年限分析申上者伏以選人或有出身或因除授各拘上例方赴調集多因遠地兵戈兼以私門事故遂致過格固非願爲新條標在七年舊格容於十載臣等參詳其選人過格年限伏請且依舊格不問被憂停集除本選數過格十年外不在選集之限

王蟾應歸吏部考試奏

天成二年四月  
中書門下

禮部貢院申當司奉今月六日勅吏部流內銓狀據白院狀申當司先准禮部貢院牒稱具成德軍解送到前進士王蟾狀請罷攝深州司功參軍應宏詞舉前件人准格例

應重科合在吏部其王蟾并解送吏部請准例指蹤者當  
司遂具狀申堂奉判送吏部分析近年事例如何者伏緣  
近年別無事例今檢登科錄內僞梁開平三年應宏詞登  
科二人前進士余渥承旨舍人李愚考官二人司勳郎中  
崔景兵部員外郎張貽憲者再具狀申堂奉判送吏部准  
例指揮者其前進士王蟾應宏詞考官試官合在流內銓  
申請者前進士王蟾請應宏詞伏自近年以來無人請應  
今詳格例合差考官二人又緣只有王蟾一人獨應銓司  
未敢懸便奏請差官者奉中書門下牒奏勅宜令禮部貢

院就五科舉人考試者伏以舉選公事皆有格條准新定  
格勅文宏詞拔萃准長慶二年格吏部差考試官二人與  
知銓尚書侍郎同考試聞奏又准格節文內准太和元年  
十月二十三日勅應禮部諸色貢舉人及吏部諸色科目  
選人凡無出身及未有官只合於禮部應舉有出身有官  
方合於吏部赴科目選其請應宏詞舉前進士王蟾當司  
當年放及第後尋已開過吏部訖若應宏詞例待南曹判  
成卽是科目選人事理合歸吏部況緣五科考試官只考  
學業難於同考宏詞者



請下所司抄錄詔書送館奏

天成二年九月史館

伏奉九月八日勅國祚中興已逾五載皇基統嗣爰及兩朝其有紀年之書行事之紀未聞編錄實謂曠遺所司旣不舉明史官又無起請因循斯久闕漏轉多宜令史臣先修太祖武皇帝莊宗兩朝實錄速具奏呈新朝日厯行事亦可精專纂錄無使廢墮者伏以簡編事重久闕鑒修須循廣記之規以備必書之要館司或有闕漏公事盡令提舉施行伏自陛下赴難維京以副人望宰臣百辟諸道藩侯各貢牋章請臨寶位羣情尤切三讓彌堅且行教令之

規先進代王之號既從俞允尋就續承皇澤播於萬方聖  
功超於千古伏自大駕臨至德宮宰臣百官諸道侯伯各  
上勸進牋表及聖旨謙讓批答兼宣諭諸道教令詔書及  
寶冊文並自天成元年四月後至今年九月以前內降詔  
書陛下日親時政金口所宣去弊除姦及近日敷奏省費  
從寬之事並請下所司各檢抄錄送館所冀編修總無漏  
畧

請添點檢朝班御史奏

天成二年九  
月御史臺

每遇入閣日只一員侍御史在龍墀邊祇候彈奏公事或

有兩班參雜失儀點檢不及難於舉奏者伏以入閣之儀務在整肅或少虧於恪敬則有慢於典經今欲依常朝例差殿中御史二員押鐘鼓樓位仍各綴供奉班出入所冀共爲糾察免失規程敢將舉職之程粗益朝天之敬

條覆選人事例奏

天成二年十二月  
中書門下

應諸道選人等其中有過格年深無門參選者准天成二年十月二十三日德音並委吏部南曹磨勘如實曾阻兵戈者許令注擬如或詐稱不在此限者凡是選人專思合格不肯固踰選限自滯身名縱限于戈須在州縣應有過

格人仰吏部南曹子細磨勘曾阻兵戈州府去處或曾假攝卽有隨處文牒一一指實卽便送銓司亦須詳先授告身攝牒及審驗年貌方可注擬三銓注擬自有常規從前或有宰臣占著好州縣員闕不令銓曹注授今年應是員闕並送曹銓候移省之時若有好闕尚在必議勘尋其請託及受囑人等當行黜責選人之內族類甚多經任之中資考備在應南曹判成人等仰三銓各據逐人出身入仕文書一一比驗年貌灼然不謬方與注官據長定格選人中有隱憂者殿五選伏以人倫之貴孝道爲先旣有負於

尊親定不公於州縣有傷風教須峻條章自今後諸色官員內有隱冒憂勞者勘責不虛終身不齒所有入仕已來告勅並封付所司焚毀

覆追崇廟號奏

天成二年宰臣

臣聞德教重於日新禮經不自天降故歷代之有損有益隨時之可止可行且華蟲象袞之規三皇未備雲鳥紀官之制五帝皆殊考其言而旣出舊章窮其理而便爲故實恭惟朝廷之重宗廟爲先事繫承祧義符致美將以觀盛德於七代展明祀於十倫一時而儻墜斯文千載而永爲

闕典且聖朝追尊之日卽引漢氏舊儀在漢氏封崇之時復依何代故事是以理關凝滯未協聖謨道合變通方爲民則且王者功成治定制禮作樂正朔服色尚有改更尊祖奉先何妨沿革若應州必立別廟卽地遠上都定虧孝享之儀徒有尊崇之稱伏據開元中追尊臯陶爲德明皇帝涼武昭王爲興聖皇帝皆立廟於京都制度斯在況陛下入清內難光闡帝圖德澤廣浹於華夷廟享猶虧於祖禰若宮廟須成於遠塞則烝嘗慮闕於孝思今臣等商量所議追尊四廟望依御札並加帝號兼請於雒京選地立

廟

請令宰臣兼判國子祭酒奏

天成三年正月  
中書門下

伏以祭酒之資歷朝所貴爰從近代不重此官經天緯地  
莫如文戡定禍亂莫如武武不可不講文不可不修況屬  
聖朝方勤庶政須宏雅道以振時風望令宰臣兼判國子  
祭酒事如蒙允許望內賜處分

重給告身事例奏

天成三年正月

吏部格式司狀申當司先准勅及堂帖指揮應焚毀告身  
勘同人及失墜文書等臣伏請重給告身令先與檢勅甲

如無勅甲可檢卽仰取同勅甲人告身勘驗同卽與出給  
若是本朝授官及同光元年後授勘檢同卽重與告身如  
是僞朝授官勘檢不虛卽與出給公驗便同告身例處分  
者伏以再給文書實爲難重有司點檢務在周防當司近  
曾申堂請以合准指揮出給告身公驗旋具選人出身歷  
任行止牒甲庫永爲應驗證明奉判准申者其所追取到  
選人授官勅甲或同勅甲告身勘驗旣同須准前指揮出  
給見有勅甲者便須注出重給事繇年月日若不注破慮  
恐選人却將失墜告身參選刺驗勅甲旣同文書浩大所



司難爲一一點檢如是引驗同勅甲之人告身出給佗後却將失墜文書選時甲庫又無憑應驗其同勅甲人告身欲於後面連粘紙亦須使印批注仍牒報南曹要憑將來檢勘者

請定奏薦人數奏

天成三年五月  
中書門下

在朝庶官有託故停官者時日稍多卽却與前官百司人吏合格者並從選未合格者逐司以年勞奏薦只與勒留官凡百司長官月限將滿及已有人替不得奏薦人使改補職次諸道薦人總與不可全阻又難今後諸道節度使

每年許薦二人帶使相者許薦三人團練防禦使各一人  
節度觀察判官並留旨授書記已下卽隨府

請臨軒冊命奏

天成三年十一月  
中書門下

舊制凡降冊命至尊臨軒伏自陛下纂襲繼有封崇但申  
持節之儀尚闕臨軒之禮今後有封冊請御正衙雖勞萬  
乘之尊冀重九天之命如此則行之者禮備受之者感深  
寧惟轉耀於皇猷實亦永標於青史

論宰臣常朝宜拜奏

天成三年十二  
月中書門下

逐日常朝宣奉勅不坐兩省官與東西兩班並拜押班宰

相不拜或聞班行所論承前日有廊餐百官謝食兩省卽各有常厨從來不拜或云侍臣不拜檢尋故實不見明規百寮拜爲有廊餐卽承旨合宣有勅賜食供奉官不拜亦恐非儀且左右前後之臣日面天顏豈可不拜臣等商量今後常朝押班宰臣亦拜通事舍人亦拜閤門外放仗亦拜

朝官升任宜令中謝奏

天成四年正月  
中書門下

准往例起居補闕拾遺御史郎中員外郎少卿監國子司業已下每加新命祇於正衙謝後便常朝竊見邊遠令錄

尚自對敷班行臣寮並宜中謝今後凡升朝官望並令中謝

請復置格杖奏

天成四年三月御史臺

臺中舊有格杖近年不行每有決遣公事皆於河南雒陽兩縣追取人杖今緣臺中常有囚徒勘責若一一於兩縣追取又緣地理遙遠及後差人往來交妨指揮公事者今臺請置行人杖免妨滯公事

羣臣乞假覲省請量賜茶藥奏

天成四年三月  
中書門下

孔子有言曰教以孝所以敬天下之爲人父者教以悌所

以敬天下之爲人兄者教以忠所以敬天下之爲人君者  
往聖深旨中古明規方當孝理之朝尤重人倫之本今後  
羣臣內有乞假覲省者欲請量賜茶藥所貴勸人之善表  
主之恩誠有益於皇猷且無損於國勢況在班行有父母  
者甚少旣資風化動挂宸衷

請准舊式五月一日起居奏

天成四年四  
月中書門下

五月一日入閣起居准貞元七年四月二十八日勅昔者  
聖賢觀象因天地交會之次爲父子相見之儀沿習成風  
古今不易王者制事在於因人酌其情而使中順其俗以

爲禮咸覲之禮旣行父子之間資事之情豈隔君臣之際  
自今後每年五月一日御宣政殿與文武百寮相見京官  
九品以上外官因朝奏在京者並聽就列宜令所司量定  
儀注頒示天下仍編禮式永著常規者伏以本朝舊制近  
代不行方當開泰之期難曠會同之禮宜興墜典以耀明  
庭五月一日應在京九品以上官及諸進奉使並准貞元  
七年勅就位起居自此每年永爲常式者

景宗宜合食太廟奏

天成四年五  
月中書門下

先據太常寺定少帝諡昭宣光烈孝皇帝廟號景宗伏以

本朝基構垂三百年昭宗以中否東遷少帝以沉寃晏駕  
始封侯於僞室新立廟於聖朝追奕世之尊雪當年之恥  
先皇帝初定中原之後昭宗少帝尋合一時入廟所司不  
舉遂成闕禮旣睽昭穆難會烝嘗太廟有合食之儀外邑  
無登歌之奏生曾爲帝享乃承祧旣號景宗合入太廟如  
不入廟難以言宗須叶徽章免貽羣議於理而論祧以遠  
廟安少帝神主於太廟卽昭穆序而宗祀正今或且居別  
廟卽欲不言景宗只云昭宣光烈孝皇帝兼冊文內有基  
字是元宗廟諱尋常泛行詔勅皆不迴避少帝是繼世之

孫冊文內不欲斥列聖之諱今改基爲宗字

請及第人文書詳書履歷年月奏

天成四年七月禮部貢院

今年諸邑及第人中有曾攝州縣官及有御署攝牒兼或有正授官及曾在賓幕赴舉者諸條格中書奏及第人先曾授職官者宜令所司於守攝文書內署重任舉及第年月日或改名不改名分明印押懼其轉賜於人假資冒進也其中曾授正官御署并佐幕者仍約前任資序與除一任官如自中興以來諸科及第人曾授職官者並令所司追給文書到日准今年及第人例處分已授官者不在此



限兼勒貢院將來舉人納家狀內各分析曾爲官及不曾爲官改名不改名其曾爲職官者先納歷任文書及第後准例指揮

請檢勘南郊行事官文書奏

天成四年九月  
中書門下

來年二月南郊大禮應諸司寺監合行事官伏以明德惟馨冀神靈之昭鑒作事謀始庶王道之和平前件將來行事官等旣預嚴裡希霑聖澤先宜條貫免忤擬倫應合差行事官但是前資并及第黃衣及三司徵科勒留官充任逐司寺監先引驗歷任告身分明則得差補若失墜文書

則須得本處當時公驗不得憑諸處所給憑繇如是州縣  
官須見四道五道以上應攝文牒皆是節察及直屬京防  
禦團練使差署仍點勘逐任年月遠近曾親公事及得替  
因繇不是虛牒則得收補其逐司合差職員官吏須是已  
經附奏者充不得臨時放出虛牒將來所司磨勘如不依  
元指揮公然顏情互容謬妄其逐司官吏并本人並當勘  
責各行嚴斷

條陳貢舉事例奏

天成四年十  
月中書門下

應諸道州府解送諸色舉人須准元勅差有才藝公正官

考試及格然可給解仍具所試詩賦義目帖繇送省如逐  
州府解內不署出前件指揮事節所司不在引試之限禮  
部貢院考試諸色帖經舉人今後據所業經書對義之時  
逐經須將生卷與熟卷中半考試不得依往例祇將熟卷  
試問今後主司不得受內外官寮書題薦託舉人及安排  
考試官如或實講知有才學精博者任具奏聞若受書題  
囑託致有屈人其主司與發書人並加黜責其所舉人別  
行朝典三銓南曹亦不得受諸色官員書題薦託選人如  
違並准前指揮應諸色落第人此後所司具所落事繇別

張懸文榜分明曉示除諸州府解送舉人外餘有於河南府寄應及宗正寺國子監生等亦須准上指揮其中有依託朝臣者於解內具言在某官某姓名門館考試及第後並據姓名覆試諸色舉人至入試之時前五日內據所納到試紙本司印署訖却送中書門下取中書省印印過却付司給散逐人就試貢院合請考官試官今後選舉業精通廉慎有守者充若在朝臣門館人不得奏請

重定正冬朝會禮儀奏

天成四年十一月禮官

開元禮三品以上升殿羣臣在庭竊以九品分官隨時有

異或以卑高定分或以清濁爲資積習是常造次難議請  
沿近禮依內宴列坐開元禮稱賀之後皇帝戴通天冠服  
絳紗袍百官朝服以待坐解劔履於樂縣之西北竊以開  
元舊制長安廣庭故可以究皇儀而展帝容陳百辟而贊  
羣后今京邑新造殿廡未更若用前規慮爲狹隘議請皇  
帝冠烏紗巾服赭黃袍百寮具公服候朝堂宏敞卽舉舊  
儀二舞鼓吹熊羆之案工師樂器等事繇久廢無次頗甚  
歲月之間未可補修且請設九部之樂權用教坊伶人

請禁師生稱謂奏

長興元年六月  
中書門下

伏以國設高科人貪上第所望不小其業須精實以喪亂  
年多苦辛人少半失宣尼之道倍勞宗伯之心不望超羣  
且須合格今逢聖運大闡皇猷設官共革於時訛選士實  
期於歲勝又朝廷較藝爲擇賢才或臣下收恩豈成公道  
時論以貢舉官爲邱門恩門及以登第爲門生門生者門  
弟子也顏閔游夏等並受仲尼之訓卽是師門大朝所命  
春官不曾教誨舉子舉子是國家貢士非宗伯門徒況又  
斥先聖之名失爲儒之體今後及第人放榜時並須據才  
藝高低從上依次第安排不得以雋科取鼎岳岳斗之名

爲貴冀從敦實以息浮澆兼不得呼春官爲恩門師門不得自稱門生除賜宴外不得輒有率斂別謀歡會曾赴舉落第人無故不得改名將來舉人並依據地理遠近於十月三旬下納文解如違不在收受之限

請定銓選事例奏

長興元年十月  
月中書門下

吏部流內銓諸色選人先條流試判兩節並委本官優劣等第申奏文優者宜超二資注擬其次者以同類官注擬所以勵授毫之作亦不掩歷任之勞其或於理道全疎者以人戶少處州縣同類官中比擬仍准元勅業文者任徵

引古今不業文者但據公理判斷可否不當罪在有司兼諸色選人或有元通家狀不實鄉里名號將來赴選者並令改正一一署本貫屬鄉縣兼無出身一奏一除官等宜並不加選限

請依舊格考試進士奏

長興元年十一月學士院

伏以體物緣情文士各推其工拙掄材較藝詞場素有其規程凡務策名合遵常式況聖君御宇與學盈朝倘令明示其規模或慮衆貽其臧否歷代作者垂範相傳將期絕彼微瑕未若舉其舊制伏乞下所司依詩格賦樞考試進



士庶令分職互展恪勤

請定禘饗配食奏

長興元年  
太常禮院

來年四月孟夏禘饗於太廟謹按禮經三年一祫以孟冬  
五年一禘以孟夏已毀未毀之主並合食於太祖之廟逐  
廟功臣配饗於本廟之庭本朝寶應元年定禮奉景皇帝  
爲始封之祖旣廟號太祖百代不遷每遇禘祫位居東向  
之尊自代祖元皇帝高祖太宗以下列聖子孫各序昭穆  
南北相向合食於前聖朝中興重修宗廟今太廟見饗高  
祖太宗懿宗昭宗獻祖太祖莊宗七廟太祖景皇帝在祧

金匱要略卷之二十一  
三  
廟之數不列廟饗將來禘禮若奉高祖居東向之尊則禘  
饗不及於太祖代祖若以祧廟太祖居東向之位則又違  
於禮意今所司修奉祧廟神主及諸色法物已備合預請  
參詳事須具狀申奏

欽定全唐文卷九百七十一目錄

闕名 十二

申明土貢奏

請賜東丹王等姓名奏

請編錄奏對公事奏

朝臣丁憂乞頒賚布帛奏

議覆收買京城坊戶菜園條例奏

請申定官民喪葬儀制奏

定衣服制度奏

定使相班位奏

重定三京諸道州府地望次第奏

請更定諸州貢人朝拜儀制奏

請下雨浙荆湖購募野史奏

新立條件奏

請量減選數奏

詳斷盧嵩等奏

定私鹽科罪奏

核定雪冤超資條例奏

欽定金唐文卷九百七十一

闕名 十二

申明土貢奏

長興二年  
正月戶部

當司所管天下合貢方物法長興元年三月定到七十餘  
州舊例冬至齊到正仗前點檢至元日於殿前排列當司  
引進昨點檢今年正仗前七十州所貢方物內六十七州  
正仗前至其餘二十州自正月至三月方到京師其江陵  
府所貢胎白魚臣勘本道進奏官狀稱每年臘月裏造至  
正仗未堪貢進固難及限猶慮其餘州未曾嚴加告諭不

金史卷一百一十二  
二  
可使議刑名請行勅命約束如來年正仗前貢物不齊其  
本州錄事參軍及勾押官典量定殿罰又棣州合進蘿摩  
子本州稱無本色折進價錢絹一匹伏以任土作貢必須  
產在封疆本色不供價錢何取兼恐顧茲名目廣有科求  
其價絹請停

請賜東丹王等姓名奏

長興二年三  
月中書門下

東丹王突欲遠泛滄波來歸皇化旣服冠帶難無姓名兼  
惕隱等頃以力助王都罪同禿餒爰從必死并獲再生每  
預入朝各宜授氏庶使族編姓譜世荷聖恩允符前代之

規永慰遠人之款自突欲以下請別賜姓名仍准本朝蕃官入朝例安排

請編錄奏對公事奏

長興二年三月史館

當館應諸處及諸司關送到合編錄公事外伏准舊制國朝有時政記并起居注並合送館以備纂修近代已來闕行此事只以每遇入閣兼內殿起居朝臣待制轉對公事逐人抄送當館如有顯具頒行逐司關報到者旋據逐件一一於日歷收記其有直下所司并行之事當館無由得知若只憑本官供到所奏狀本未免簡編不備本末難窮

已後待制轉對公事等除顯具頒行關送到館外應有直下所司及不行未行之事伏乞宣付當館旋依次第編錄其時政記起居注并內庭逐日合書日歷亦乞相次逐旋

朝臣丁憂乞頒賚布帛奏

長興二年四月  
中書門下

尚書都官員外郎知制誥張昭遠丁母憂伏以大臣枕由有弔祭之恩羣寮寢苦無慰問之例高下之位有間君臣之事無偏況卿士甚多有父母者極少固於孝道上軫聖懷張昭遠望量與恩賜自此朝臣或有丁憂亦乞頒賚其狀尋已印出今具官員等第支給數目如後文班左右常



侍諫議給事舍人諸部尚書太子賓客諸寺六卿監察御史中丞國子祭酒詹事左右丞諸部侍郎絹三十匹布二十匹粟麥各二十五石起居補闕拾遺侍御史殿中監察御史左右庶子諸寺少卿國子監司業河南少尹左右諭德諸部郎中員外郎太常博士絹二十匹布一十五匹粟麥各一十五石國子博士五經博士兩縣令著作郎太常宗正殿中丞諸局奉御大理寺太子中允洗馬左右贊善太子中舍司天五官正絹布各一十五匹粟麥各一十石左右諸司大將軍左右諸衛將軍絹二十匹布一十五匹

粟麥各一十五石左右率府副帥絹布各一十五匹粟麥一十石

議覆收買京城坊戶菜園條例奏

長興二年六月河南府

准勅京城坊市人戶菜園許人收買竊慮本主占佃年多以鬻蔬爲業固多貧窶豈辦蓋造恐資有力轉傷貧民

請申定官民喪葬儀制奏

長興二年十月御史臺

先奉勅前守亳州譙縣主簿盧茂謙進策內已事竊見京城內偶遭凶喪者身不居於爵祿葬有碍於條流頃使輓甲車殯送者事雖該於往制勅已著於前文或值炎鬱所

拘偶緣畱駐利便須期於時日貧窮旋俟於告投停日旣多塋園又遠伏乞特付所司別令詳定權免鼈甲車送葬者奉勅送葬之儀雖防越制令文之設亦許便時其或候厯炎天事從遠日停畱旣久遷送有期車中便苦於撼搖陌上可量於凶穢人情所病物議僉同宜在酌中應成惻隱應喪葬自五品已下至庶人自春夏秋冬宜並許第等置輦其餘儀式一切仍舊兼喪車亦不全廢如要令陳於靈輿之前其輦大小制度及結絡遮蔽所使匹帛顏色并擎昇人數次第仍令御史臺詳核據品秩等級士庶高低各

定規制施行兼空城內舊制比無居人近日許人戶逐便  
居止或有喪死旋須遷送其出時並昇遣次第亦可穩便  
制置務在得宜者今臺司准勅追到兩市葬作行人白望  
李溫等四十七人責得狀稱一件於梁開平年中應京城  
海例不以高例及庶人使錦繡車輦並是行人自將狀於  
臺巡判押一件至同光三年中有勅著斷錦繡祇使常式  
素車輦其輦稍有力百姓之家十二人至八人魂車虛喪  
車小輦子不定人數或是貧下四人至兩人迴使素紫白  
絹帶額遮幃輦上使白粉掃木珠節子上使白絲其引魂

車小輦子使結麻網幕後至天成三年中有勅條流庶人  
斷使輦祇令別制造籠甲車載亦是紫油素物至今行內  
見使者今臺司按葬作行人李溫等通到狀并於令內及  
天成四年六月勅內詳穩便喪置定制五品至八品升朝  
官六品至九品不升朝官等及庶人喪葬儀制謹具逐件  
如後五品至六品升朝官使二十人舁輦車竿高七尺長  
一丈三尺濶五尺以白絹全幅爲帶額婦人以紫絹爲帶  
額並畫雲氣周迴遮蔽上安白粉掃木珠節子二十道魂  
車一小香輦子一並使結麻網幕魑頭車一挽歌八人練

布深衣披引鐸翼各一不得著錦繡明器三十事四神十二時在內四神不得過一尺餘不得過七寸園宅一方三尺其明器物不得以金銀毛髮裝飾共置八輦內許兩箇紵羅已上並不得使結絡錦繡裝飾如事力不辦任自取便七品至八品升朝官使一十六人舁輦車竿高七尺長一丈三尺濶五尺以白絹全幅爲帶額婦人以紫絹全幅爲帶額周迴遮蔽上安白粉掃木珠節子二十道魂車香輦子各一並使結麻網幕魃頭車一明器二十事以木爲之四神十二時在內四神不得過一尺餘不得過七寸不

得使金銀雕鏤帖毛髮裝飾園宅一方二尺五寸共置六  
輦挽歌一十六人練布深衣披引鐸翬各一已上並不得  
著錦繡結絡裝飾如事力不辦任從所便六品至九品不  
升朝官使一十二人舁輦車竿高六尺長一丈一尺濶四  
尺以白絹全幅爲帶額婦人以紫絹爲帶額周迴遮蔽上  
安白粉掃木珠節子一十六道魂車一香輦子一並使結  
麻網幕明器一十五事並不得過七寸以木爲之不得使  
金銀雕鏤帖毛髮裝飾共置五輦挽歌四人練布深衣鐸  
翬各一不得著錦繡及別有結絡裝飾如事力不辦任自

取便檢校兼試官並依此例庶人使八人舁輦車竿高五尺五寸長一丈濶四尺男子以白絹半幅爲帶額婦人以紫絹半幅爲帶額周迴遮蔽魂車一香輦子一使結麻網幕明器一十四事以木爲之不得過五寸共置五輦不得使紗籠金銀帖毛髮裝飾除此外已上不得使結絡錦繡等物色如人戶事力不辦八人已下任自取便其喪輦車已准勅不全廢任陳靈輦之前者已上每有喪葬行人具所供行李單狀申知臺巡不使別給判狀如所供賃不依狀內及踰制度仍委兩巡御史勒驅使官與金吾司并門



司所由同加覺察如有違犯追勘行人請依天成二年六月三十日勅文行人徒二年喪葬之家卽不問罪者皇城內近已降勅命指揮每有喪葬以色服蓋身出城外任自逐便如迴來不得立引魂旛子却著孝衣入皇城内者今請再降旨命指揮皇城内此後每有人戶喪葬令至晚淨後取便出門不得取內外諸色趨朝官右謹具定到五品至八品升朝官六品至九品不升朝官及檢校兼試官并庶人喪葬儀制如右

定衣服制度奏

長興三年正月太常禮院

衣服制度准貞觀四年八月十四日詔曰冠冕制度已備  
令文舞常服飾未爲差節於是三品已上服紫四品五品  
已上服緋六品七品以綠八品九品以青婦人從夫之色  
仍通服黃至五年七月一日勅七品以上服龜甲雙巨十  
花綾其色綠九品以上服絲布及雜小綾其色青又咸通  
五年五月十日勅如聞在外軍人百姓有不依令式遂於  
袍衫之內著朱紫青綠等色短衫襖子或在閭野公然露  
服貴賤莫辨有蠹彝倫自今已後衣服上下各依品秩上  
得通下下不得僭上仍令所司嚴加禁斷又武德四年七

月十六日制三品已上服大料細綾及羅其色紫五品已上服小料細綾及羅其色朱六品已上服絲布雜小綾交梭其色黃七品八品九品流外庶人服細綾純布其色黃白者又永徽三年八月十四日詔魚袋之制恩榮所加本緣品命帶魚之法事章要重者臣今詳酌本非朝命不得輒懸魚袋內外臣僚所衣朱紫服飾降於近代不越時宜將健衣裝各立軍號當司從來無例檢詳其經商百姓等則不得著色樣綾羅及紫皂雜色衣服金色帶亦不載短長制度

定使相班位奏

長興三年正月  
中書門下

見任宰臣四員外其餘諸使兼侍中中書令平章事並是使相向來班序皆在見任宰臣之下今緣秦王從榮是親王新加兼中書令與諸使相不同每遇排班及到中書位次今特商議伏以政事之權雖崇四輔周行之列亦長諸王宜顯奉於本枝固不同於異姓今後望請親王官至兼侍中中書令則與見任宰臣分班定位宰臣居左諸王兼侍中中書令居右如親王及諸使守侍中中書令亦並是使相既不知印不署勅亦分行居右其餘使相請依舊規

重定三京諸道州府地望次第奏

長興三年四月  
中書門下

奉勅重定三京諸道州府地望次第者據十道圖舊制以王者所都之地爲上本朝都長安遂以關內道爲上今宗廟宮闕現都洛陽請以河南道爲上關內道第二河東道第三餘依舊制又本朝都長安以京兆府爲上今都洛陽請以河南府爲上其五府按十道圖以關內道爲上遂以鳳翔府爲首河中成都江陵興元爲次中興初升魏博爲興唐府鎮州爲眞定府皆是創業興王之地不與諸府雷同今望以興唐眞定二府升在五府之上合爲七府餘依

舊制

請更定諸州貢人朝拜儀制奏

長興三年十二月禮部貢院

准會要長壽二年七月十日左拾遺劉承慶上疏曰伏見比年以來天下諸州所貢方物至元日皆陳在御前惟貢人獨於朝堂列拜伏請貢人至元日列在方物之前以備充庭之禮制曰可近年直至臨鑠院前赴應天門外朝見今後請令舉人復赴正仗仍緣今歲已晚貢士未齊欲且據見到人點引牒送四方館至元日請令通事舍人一員引押朝賀列在貢物之前或以人數不少卽請祇令諸科

解頭一人就列其餘續到者候齊日別令朝見如蒙允許  
當司卽於都省點別習儀

請下兩浙荆湖購募野史奏

長興三年十一月史館

當館昨爲大中以來迄於天祐四朝實錄尚未纂脩尋具  
奏聞謹行購募勅命雖頒於數月圖書未貢於一編蓋以  
北土州城久罹兵火遂成滅絕難可訪求竊恐歲月漸深  
耳目不接長爲闕典過在攸司伏念江表列藩湖南奧壤  
至於閩越方屬勲賢戈鋌自擾於中原屏翰悉全於外府  
固多奇士富有羣書其兩浙福建湖廣伏乞詔旨委各於

本道采訪宣宗懿宗僖宗昭宗以上四朝野史及逐朝日  
歷銀臺事宜內外制詞百司沿革簿籍不限卷數據有者  
抄錄上進若民間收得或隱士撰成卽令各列姓名請議  
爵賞

新立條件奏

長興四年二月  
禮部貢院

一九經五經明經呈帖經之時試官書通不後有不及格  
者唱落後請置筆硯將所納由分明却令自看或是試官  
錯書通不當與改正如懷疑者使許請本經書面前檢對  
如實是錯誤卽更於帖上書名而退一五科常年駁勝出



多稱屈塞今年並明書所對經書墨義云第幾道不第幾道粗第幾道通任將本經書疏照證如考試官錯書不粗請別將狀陳訴當再加考較如實錯誤妄陳文狀當行嚴斷一今年舉人有抱屈落第者許將狀披訴貢院當與重試如貢院不理卽詣御史臺論訴請自試舉人日令御史臺差人受舉人訴屈文狀并引本身勘問所論事件或知貢舉官及考試官已下取受貨賂昇擢親情屈塞藝能應副囑託及不依格去畱一事有違請行朝典一懷挾書策舊例禁止請自今年後入省門搜得文書者不計多少准

例扶出殿將來一舉上鋪後搜得文書者准例扶出殿將  
來兩舉一遙口授人迴授試處及抄義題帖書時諸般相  
救准例扶出請殿將來三舉一自是藝業未精准格落下  
出外及見駁榜後羞見同人妄扇屈聲擬爲將來基址及  
別人帖對過場數多者便生誣玷墜陷或羅織毆罵者並  
當收禁榜送御史臺請賜勘窮如知貢舉官及考試官事  
涉徇私屈塞藝士請行朝典若虛妄者請痛行科斷牒送  
本道重處色役仍永不得入舉場同保人亦請連坐各殿  
三舉

請量減選數奏

長興四年二月  
月中書門下

諸道州府官甚有闕員前資官皆拘選限其間有朝廷選  
擇侯伯薦揚得者無多餘難驟進或病跼於陋巷或老謝  
於窮途宜開振滯之門雅合推恩之道今等第減選者一  
選者無選可減親公事得資考者宜優與處分不得資考  
者准格施行兩選三選者減一選四選五選者減兩選六  
選七選者減三選八選九選者減四選十選十一選者減  
五選十二選者減六選千牛進馬童子齋郎挽郎宜准元  
和處分

詳斷盧嵩等奏

長興四年五月大理寺

既關威力之條合處殺人之罪但以情非巨蠹事准格文爰該免死之科式表好生之德盧嵩准格配流天德曳撲人王光祚配流登州

定私鹽科罪奏

長興四年五月鹽鐵使

應食課鹽州府省司各置權糶折博場院應是鄉村並通私商興販所有折博并每年人戶蠶鹽並不許將帶一斤一兩入城侵奪權糶課利如違犯者一兩已上至一斤買賣人各決臀杖一十三放一斤已上至三斤買賣人各決

臀杖十五放三斤已上至五斤買賣人各決脊杖十三放  
五斤已上至十斤買賣人各決脊杖十七放十斤已上不  
計多少買賣人各決脊杖二十處死有犯鹽人隨行錢物  
驢畜等並納入官所有元本家業田莊如是全家逃走者  
卽行典納仍許般載脚戶經過店主人脚下人力等糾告  
等第支與優給如知情不告與買賣人同罪其犯鹽人經  
過處地分門司廂界巡檢節級所縣并諸色關連人等不  
專覺察卽據所犯鹽數委本州臨時科斷訖報省如是門  
司關津口鋪捉獲私鹽卽依下項等第支給一半賞錢一

斤已上至十斤支賞錢二十貫文五十斤已上至一百斤支賞錢三十貫文一百斤已上支賞錢五十貫文應食未鹽地界州府縣分並有榷糶場院久來內外禁法卽未有一概條流應刮鹹煎鹽不計多少斤兩並處極法兼許四鄰及諸色人等陳告等第支與賞錢欲指揮此後犯一兩已上至一斤買賣人各決臀杖十三放一斤已上至二斤買賣人各決臀杖十五放二斤已上至三斤買賣人各決脊杖十六放三斤已上至五斤買賣人各決脊杖十七放五斤已上買賣人各決脊杖二十處死如是收到鹹土鹽

水卽委本處煎煉鹽數准條流科斷或有已曾違犯不至死刑經斷後公然不懼條流再犯者不計斤兩多少所犯人並處極法其有權糶場院員寮節級人力煎鹽池各竈戶般鹽船綱押綱將軍衙官稍工等具知鹽法如有公然偷盜官鹽或將貨賣其買賣人及窩般主人知情不告並依前項刮鰾例五斤已上處死者其諸色關連人等並各支賞錢卽准雒京邢鎮州條流事例指揮顆末青黃等鹽元不許界分參雜其顆鹽先許通商之時指揮不得將帶入末鹽地界如有違犯一斤一兩並處極法所有隨行色

物除鹽外一半納官一半與捉事人充優賞其餘鹽色未  
有畫一條流其雒京并鎮定邢州管內多有北京末鹽入  
界捉獲並依雒京條流科斷欲指揮此後但是顆末青白  
諸色鹽侵界參雜捉獲並准雒京條例施行慶州青白權  
稅元有透稅條流所有隨行驢畜物色一半支與捉事人  
充優賞其餘一半并鹽並納入官欲並且依舊一斗已上  
至三斗決臀杖十五放三斗已上至五斗決脊杖十三放  
五斗已上處死安邑解縣兩池權鹽院河府節度使兼判  
之時申到畫一事件條流等准勅牒兩池所出鹽舊日若



無榜文如擅將一斤一兩准元制條並處極法其犯鹽人應有錢物並與捉事人充優賞者切以兩池禁棘峻阻不通人行四面各置場門弓射分擘鹽池地分居住並在棘圍內更不別有遺差祇令巡護鹽法如此後有人偷盜官鹽一斤一兩出池其犯鹽人並准元勅條流處分應有隨行錢物並納入官其捉事人依下項定支優給若是巡檢弓射池場門子自不專切巡察致有透漏到棘圍外被別人捉獲及有糾告兼同行反告官中更不坐罪陳告人亦以捉事人支賞應知情偷盜官鹽之人亦依犯鹽人一例

處斷其不知情關連人臨時酌情定罪所有透漏地分弓  
射及池場門子如是透漏出鹽十斤已下決脊杖十五放  
一十斤已上與犯鹽人同罪科斷一斤已上至十斤支賞  
錢一十貫文十斤已上至五十斤支賞錢二十貫文五十  
斤已上至一百斤支賞錢三十貫文一百斤已上支賞錢  
五十貫文前項所定奪到鹽法條流其應屬州府捉獲抵  
犯之人便委本州府檢條流科斷訖申奏別報省司其屬  
省院捉到犯鹽之人于死刑者卽勘情申上候省司指揮  
不至極刑者便委務司准條流決放訖申報奏

核定雪冤超資條例奏

長興四年五  
月中書門下

准長興元年二月二十一日南郊赦書節文州縣官在任  
日雪得冤獄許非時參選超資注官仍賜章服今詳勅命  
凡云冤獄者所司推鞠定罪不平迴曲作直已成案牘或  
經長吏慮問或是家人訴冤重結推訊始見情實迴死爲  
生始名雪冤仍須元推官典招伏情罪本處檢案牘事節  
給與公憑更於考牒內署出候本官滿日便准近勅非時  
參選若活得一人超一資注官二人已上加章服已有章  
服加檢較官如在任除雪冤獄外限內徵科了絕減得一

選已上或招添戶口至一分已上並許酬獎如加官至五品已上許奏聽勅旨如雖雪得冤獄徵科違限不了合殿選者亦待殿選滿日與敘雪冤之賞或逃却戶口亦據降等敘官如本司小小刑獄未經別司縱能處斷不得援例